
ԱՄՆ-Ի ՀԱՅԵՐԻ ՄԱՍՆԱԿՑՈՒԹՅՈՒՆՆ ՈՒ ՆՊԱՍՏԸ
ԿԻԼԻԿՅԱՆ ԿԱՄԱՎՈՐԱԿԱՆ ՇԱՐԺՄԱՆԸ (1916–1920 ԹԹ.)
(1918 թ. Արարայի ճակատամարտում “Հայկական լեգեոնի” տարած հաղթանակի
100-ամյակի առթիվ)

ՔՆԱՐԻԿ ԱՎԱԳՅԱՆ

Առաջին աշխարհամարտի ընթացքում (1914–1918 թթ.) և դրան հաջորդող տարիներին առավելապես առաջին սերնդի ամերիկահայերի համար հայրենի ժողովրդի սատարմանն ուղղված ջանքերը եղել են գործնական ու ծանրակշիռ կրելով թե՛ քաղաքական ու դիվանագիտական, և թե՛ հասարակական, տնտեսական ու ռազմական բնույթ: Վերջինս արտահայտվել է ռազմամթերքի, դրամական միջոցների, նաև՝ մարդկային ուժի՝ կամավորների առաքումով, որն իրականացվել է, գլխավորապես, հայկական կուսակցությունների ու կազմակերպությունների կողմից:

Ամերիկահայերն իրենց գործուն մասնակցությունն են ունեցել Առաջին աշխարհամարտի տարիներին և հետո Կովկասում, ապա՝ Կիլիկիայում կազմակերպված կամավորական շարժումներին՝ սկսած 1915 թ. Վանի ինքնապաշտպանական կռիվներից 1918 թ. Արարայի հերոսամարտը՝ ցարական Ռուսաստանի և Ֆրանսիայի զորամիավորումների հետ կողք կողքի քաջաբար մարտնչելով գերմանաթուրքական ուժերի դեմ: Կամավորական շարժման նշանաբանն էր՝ “Ինքնավարություն վեց վիլայեթներու և անոնց անբաժան մասը կազմող Կիլիկիայի՝ Ռուսաստանի հզոր հովանաւորութեան տակ”²:

1916 թ. հոկտեմբերի 27-ին Ֆրանսիայի և Մեծ Բրիտանիայի կառավարությունները, Փարիզի Հայ ազգային պատվիրակության նախագահ Պողոս Նուբարի մասնակցությամբ, Լոնդոնի ֆրանսիական դեսպանատանը համատեղ համաձայնության էին եկել (Սայքս-Պիկոյի համաձայնություն)՝ ստեղծել հայ, ինչպես նաև արաբ (սիրիացի, ալժիրցի, մարոկացի և այլ)³ կամավորներից բաղկացած ու “օսմանյան իշ-

¹ Ք. Ավագյան. Ամերիկայի Միացյալ Նահանգների հայ գաղութի պատմությունը (սկզբնավորումից մինչև 1924 թ.), Երևան, 2000, էջ 114–119:

² Ջ. Կիրակոսյան. Առաջին համաշխարհային պատերազմը և արևմտահայությունը (1914–1916 թթ.), Երևան, 1965, էջ 187, Գ. Լազեան. Հայաստանը եւ Հայ Դատը ըստ դաշնագրերու, Գահիրե, 1942, էջ 81:

³ Forgotten Heroes. The Armenian Legion and the Great War. An Exhibit Commemorating the 83rd Anniversary of the Armenian Legion’s Victory on September 19, 1918, at Arara (Palestine).

խանությունների նկատմամբ չեզոք»՝ «Արևելյան լեգեոն» («Légion d'Orient») անվանումը կրող զորամիավոր, որը, իբրև օժանդակ ուժ, պատերազմի տարիներին ֆրանսիական բանակի կազմում պետք է կովեր բացառապես Ասիական Թուրքիայի մաս կազմող Սիրիայում և Կիլիկիայում, այնուհետև՝ թուրքերի դեմ հաղթանակից հետո, որպես քաղաքապահ ուժ (միլիցիա), ապահովեր ֆրանսիական հոգատարության ներքո Կիլիկիայի ինքնավարությունը: «Արևելյան լեգեոնի» կազմակերպման ծախսերն իր վրա էր վերցնելու ֆրանսիական կառավարությունը, որը հոգալու էր կամավորների տեղափոխման ճանապարհածախսը, հիվանդության ու հաշմանդամության ծախսերը: Կամավորները, որոնք պետք է ներկայացնեին լավ վարքի վկայական, մարզվելու և դեկավարվելու էին ֆրանսիական սպաների ու ենթասպաների կողմից, վարձատրվելու էին ֆրանսիական զինվորների նման, ստանալու էին նույն պարենը, ինչ ֆրանսիացի զինվորը: Լեգեոնը սկզբնապես հաստատվելու էր Կիպրոսում (Ֆամագուստա նավահանգստից 40 կմ հեռավորության վրա գտնվող Մոնարկա ծովեզրյա սարահարթային վայրում, երբեմնի Լևոն V կիլիկյան թագավորի գերեզմանի մոտ)⁴, որտեղ ժամանելու էին Մարսելի, Բորդոյի և Պորտ-Մայիդի գրասենյակներում գրանցված տարբեր վայրերից ժամանած հայ կամավորները: Մայքս-Պիկոյի համաձայնագրի մեջ նշված էր. «1. Որ կամավորները ո՛չ Ֆրանսական, ո՛չ ալ Եւրոպական ուրիշ ճակատներու վրայ պիտի կռուին, այլ միայն ու միայն Ասիական Թուրքիոյ մէջ պիտի գործածուին՝ իրենց դարաւոր թշնամիին դէմ պատերազմելու եւ ազատագրելու իրենց մայրենի հողը: 2. Որ՝ Ֆրանսա, Դաշնակիցներու յաղթանակէն յետոյ, պիտի նուիրուի Կիլիկիոյ ինքնավարութիւն ապահովելու գործին, իր հոգատարութեան ներքեւ»⁵:

1916 թ. նոյեմբերի 26-ին հիմնվել է օսմանյան հպատակներից կամավոր հիմունքներով հավաքագրված «Արևելյան լեգեոնը»: Կամավորագրումը սկսվել է Եգիպտոսում, որի կորիզը կազմել են 600 մուսալեռցի (ֆրանսիական կառավարութ-

September 23-December 31, 2001. Prepared by B. Merguerian (ALMA) (*այսուհետև՝ Forgotten Heroes*), Watertown, 2001, p. 8.

⁴ Խ. Աճէմեան Քհնյ. Հայկական Լեգեոնը. – □Համագային□ի տարեգիրք 1953, Պէյրուս, 1952, էջ 72:

⁵ Մ. Գ. Ճիգմէճեան. Պատմութիւն ամերիկահայ քաղաքական կուսակցութեանց (1890–1925), Ֆրէզնօ, 1930, էջ 345, Տ. 3. Պօյաճեան. Հայկական Լեգեոնը. Պատմական յուշագրութիւն, Ուօթրթաուն, 1965, էջ 8–10, 13:

յան աջակցությամբ Պորտ-Սայիդում ապաստանածներին⁶, ապա նաև՝ 300 եգիպտահայ, ինչպես նաև՝ օսմանյան բանակից ու այլ վայրերից փախստական 236 հայ⁷:

Համայն հայության բարոյական, քաղաքական, նյութական կարողությունները համախմբելու, Հայ դատին ի նպաստ ազգային և միջազգային գործունեություն կազմակերպելու, ֆրանսիական հրամանատարության ներքո արևմտահայության շրջանում ծավալված կամավորական շարժումը կանոնավորելու ու նպատակաուղղելու, հայանպաստ այլ ձեռնարկներ իրականացնելու և վերահսկելու հատուկ միտումով 1917 թ. սկզբին Եգիպտոսում ստեղծվել էր ազգային հիմնական կառույցները (կուսակցական, եկեղեցական, բարեսիրական) համախմբող՝ «Հայ ազգային միություն» անունով կենտրոնական մարմին, որը շատ կարճ ժամանակում իր մասնաճյուղերն է հիմնել տարբեր հայաշատ գաղութներում:

Այդ նպատակով, Պ. Նուբարի հանձնարարագրով մարտի սկզբին ԱՄՆ է առաքվել ազգային երեք կուսակցությունը ներկայացնող պատգամավորություն (Ստեփան Սապահ-Գյուլյան՝ ՄԴՀ-ից, Արտաբաստ Խաչիկ Հանրմյան՝ ՀՅԴ-ից, Միհրան Տամատյան՝ ՀՄՌ-ից), որը, միաժամանակ, գնացել էր «ձեռն ու մարմին տալու համար կամաւորական շարժումին»⁸:

Կամավորագրումը մեծ ոգևորություն է առաջացրել ամերիկահայության շրջանում, քանի որ օվկիանոսից այն կողմ գտնվող այս գաղութը ևս «... կ'ալեկոծէր հայրենի հողերու ազատագրական շունչով» և «Ամերիկահայ երիտասարդութեան սիրտը կ'եռար արդէն եւ նման առիթ մը կը փնտռէր իր անտանելի դարձած սուգին վրէժն առնելու և հայ ազատագրութիւնը դարբնելու համար»⁹:

Եգիպտահայ պատվիրակության ջանքերով և համախմբման նկատմամբ ամերիկահայ ազգայինների դրսևորած բարձր գիտակցության շնորհիվ հնարավոր է դարձել 1917 թ. մարտի 16–26-ը Բոստոնում անցկացնել չորս կուսակցության միջև համերաշխության բանակցությունների յոթ նիստ, որոնց ընթացքում էլ կազմակերպվել է Ամերիկայի հայ ազգային միությունը (ԱՀԱՄ): Միությունը բաղկացած էր չորս կուսակցության (Սոցիալ դեմոկրատ հնչակյան, Վերակազմյալ հնչակյան, Հայ հե-

⁶ Ռ. Գ. Սահակյան. Թուրք-ֆրանսիական հարաբերությունները և Կիլիկիան 1919–1921 թթ., Երևան, 1970, էջ 115–116:

⁷ Յուշամատեան Մուսա Լերան, իսր.՝ Մ. Գուշագճեան, Պ. Մատուռեան, Պէրոյթ, 1970, էջ 426, Օ. Թ. Մալխագունի. Ամերիկահայ կամաւորները եւ իրենց յաղթանակը. – □Արագած□ (շաբաթաթերթ), թիւ 12, Ապրիլ 12, 1919, էջ 172, Ռ. Գ. Սահակյան. նշվ. աշխ., էջ 116:

⁸ Մ. Գ. Ճիգմէճեան. նշվ. աշխ., էջ 344, Յուշամատեան Մեծ Եղեռնի, 1915–1965, իսր.՝ Գ. Ահարոնեան, Պէրոյթ, 1965, էջ 895:

⁹ Յուշամատեան Մեծ Եղեռնի, 1915–1965, էջ 895, Վահէ Հայկ. Խարբերդ եւ անոր ոսկեղէն դաշտը, Նիւ Եորք, 1959, էջ 994:

դափռիական դաշնակցություն, Հայ սահմանադիր ռամկավար), ազգային երկու եկեղեցու (առաքելական, ավետարանական) և Հայկական բարեգործական ընդհանուր միության ներկայացուցիչներից: Ընտրվել էր միության 18 անդամից բաղկացած կենտրոնական մարմին (ատենապետ՝ Միհրան Մվազյան)¹⁰:

Առաջին աշխարհամարտի սկսվելուց ի վեր առաջին անգամ էր, որ հայ կուսակցությունները (մասնավորապես՝ ՀՅԴ-ն), միասնականություն էին հանդես բերել ազգային կարևոր ձեռնարկների իրականացման գործում: Կարճ ժամանակում ԱՄՆ-ում արդեն ստեղծվել էր միության 187 մասնաճյուղ: Ամերիկայի հայ ազգային միության նպատակն էր ամերիկահայ նյութական ու բարոյական ուժերը համախմբել և դրանք ի սպաս դնել Հայաստանի ու Կիլիկիայի ազատագրմանը, վերաշինությանը և կարոտյալների անմիջական օգնությանը, ինչպես նաև՝ ԱՄՆ-ում հայանպաստ պրոպագանդա ու դիվանագիտական ձեռնարկներ իրականացնել¹¹: Միության հասույթը ձևավորվում էր անդամավճարումներից, հանգանակություններից, նվիրատվություններից: Այն իր գործունեությունը համաձայնեցնում էր Փարիզի Հայ ազգային պատվիրակության հետ՝ հանդիսանալով նրա լիազոր ներկայացուցչական մարմինն ԱՄՆ-ում¹²:

Հմուտ դիվանագետ, ազգային, հասարակական, քաղաքական գործիչ, իրավաբան, հրապարակախոս Միհրան Մվազյանի ղեկավարած Ամերիկայի հայ ազգային միությունն իր հետամտած հայանպաստ լուրջ խնդիրների իրականացումը համազորության, մինչև անգամ միջազգային ու, հատկապես, ամերիկյան կառավարական և հասարակական մակարդակներով կազմակերպելու կարողությունների համար ամերիկյան պաշտոնական շրջանների կողմից ճանաչվել է որպես ամերիկահայ գաղութը ներկայացնող մարմին՝ դառնալով հայկական առաջին լոբբիստական կազմակերպությունը ԱՄՆ-ում¹³:

Արևմտյան Հայաստանի ազատագրության նպատակով Ամերիկայի հայ ազգային միության իրականացրած «առաջին եւ ամենանուիրական»¹⁴ գործերից մեկը եղավ ԱՄՆ-ում կամավորական շարժման կազմակերպումը: Ինչպես ասվեց, այն մեծ

¹⁰ Տեղեկագիր Հայ Ազգային Միութեան Ամերիկայի. 1917–1921 թթ., Պոստոն, 1922, էջ 11–12, Սահմանադրութիւն եւ կանոնագրութիւն Հայ Ազգային Միութեան Ամերիկայի, Պօսթօն, 1917, էջ 2, 19–20, Թէն դի կ. Ամէնուն տարեցոյցը, ԺՁ տարի, Կ. Պօլիս, 1922, էջ 286:

¹¹ Ք. Ավագյան. Հայ առաջին լոբբիստական կազմակերպությունը ԱՄՆ-ում. – □Հայոց պատմության հարցեր□, Երևան, 2003, թիվ 4, էջ 98–104, Մ. Գ. Ճիգմէճեան. նշվ. աշխ., էջ 353:

¹² Մ. Գ. Ճիգմէճեան. նշվ. աշխ., էջ 352, Սահմանադրութիւն եւ կանոնագրութիւն Հայ Ազգային Միութեան Ամերիկայի, էջ 1–2:

¹³ Ք. Ավագյան. նշվ. հոդվ., էջ 98–104:

¹⁴ Տ. Յ. Պօյաճեան. նշվ. աշխ., էջ 37–38:

խանդավառություն էր առաջ բերել գաղութում, մանավանդ որ 1917 թ. սկզբին ԱՄՆ-ն արդեն դադարեցրել էր իր չեզոքությունը և ներքաշվել Առաջին աշխարհամարտին. «Հազարաւորներ կը ձգէին հանգիստ աշխատանք ու գրասեղան, ապահով կէանք ու փայլուն ապագայ զօրացնելու համար կորիզը “հայկական բանակին”»¹⁵:

Համաձայն Փարիզի Հայ ազգային պատվիրակության և ֆրանսիական կառավարության միջև կայացած պայմանավորվածության՝ ամերիկահայ կամավորները Նյու Յորքից Բորդո պետք է մեկնեին ֆրանսիական փոխադրանավերով ու Ամերիկայի հայ ազգային միության ծախսով: Բորդոյում ֆրանսիական զինվորական դեկավարության քննությունն անցնելուց հետո նրանց պետք է արձանագրեին ֆրանսիական հրամանատարության ներքո կռվելու համար: Իսկ դաշնակից տերությունների համար պատերազմի բարենպաստ ավարտի դեպքում Կիլիկիայի պաշտպանությունն անցնելու էր հայ զինվորականությանը¹⁶:

Շարժման մասնակից Տիգրան Պոյաճյանի վկայությամբ, «Արտակարգ խանդավառութիւն ստեղծած էր հայ կամավորներով բանակ կազմելու ծրագիրը: Արձանագրուողներու թիւը ամէնուն ակնկալութենէն ու երեւակայութենէն բարձր եղաւ: Հազարաւորներ տրամադրութիւն ցոյց տուին կռուի դաշտ վազել, իրենց նահատակ արիւնակիցներու վրէժը լուծելու անգուսպ յուզումով»¹⁷:

Կարճ ժամանակում՝ ընդամենը հինգ ամսում (1917 թ. հունիսի 9– նոյեմբերի 3), ֆրանսիական հովանավորության ներքո սկսված կամավորական շարժմանն իրենց մասնակցությունը բերելու նպատակով արձանագրվել է 5.000 ամերիկահայ, սակայն, հակառակ ամերիկահայության շրջանում ստեղծված աննախադեպ խանդավառության, ֆրանսիական հրամանատարության տրամադրած փոխադրական միջոցների սղության պատճառով մեկնելու հնարավորություն է ընձեռվել ընդամենը 1.172-ին (նրանցից վերապրել է ընդամենը 250 հայ)¹⁸, իսկ մնացյալը հետագայում զինվորագրվել է ԱՄՆ-ի բանակին՝ կռվելով Գերմանիայի դեմ արևմտյան ճակատներում¹⁹:

Ականատեսների վկայությամբ, ամերիկահայերը, ոգևորված օր առաջ կամավորագրվելու նախանձախնդրությամբ և չսպասելով Ամերիկայի հայ ազգային միության կամավորներով համալրելու պարբերական հրավերներին, ժամանակից շուտ

¹⁵ Մ. Տամատեան. Իմ յուշերէս, խմբ. եւ ծանօթ.՝ Վ. Ղազարեան, Պէրոյթ, 1985, էջ 114, Յուշամատեան Մեծ Եղեռնի, 1915–1965, էջ 891:

¹⁶ Տ. Յ. Պոյաճեան. նշվ. աշխ., էջ 38:

¹⁷ Նույն տեղում, էջ 37–38:

¹⁸ A. S. Yeretzi an. A History of Armenian Immigration to America with Special Reference to Conditions in Los Angeles. A Thesis. California, 1923, p. 11.

¹⁹ Տեղեկագիր Հայ Ազգային Միութեան Ամերիկայի. 1917–1921 թթ., էջ 27, Պ. Յ. Տեփոյեան. Միհրան Տամատեան (1863–1945), Գահիրէ, 1956, էջ 196:

թողնում էին իրենց աշխատանքն ու հանգիստը և մեկնում Նյու Յորք՝ տեղում սպասելու իրենց հերթին: Մինչդեռ ֆրանսիական խոշոր շոգենավերը տրամադրվում էին ամերիկյան զինվորների փոխադրմանը, իսկ ամերիկահայ կամավորների տեղափոխման համար մեկ-երկու մեծ փոխադրանավ տրամադրելու փոխարեն հատկացվում էր շաբաթական ընդամենը մեկ անգամ յոթ-ութ տասնյակ 3-րդ և 4-րդ կարգերով ուղևոր փոխադրող ոչ բավարար տարողության բեռնակիր նավ: Արդյունքում, հինգ ամսում 17 նավով փոխադրվել է կամավորագրված ամերիկահայերի միայն 1/5 մասը:

1917 թ. ապրիլի 6-ին Առաջին աշխարհամարտին ԱՄՆ-ի ներքաշումով, ինչպես նաև ելնելով ֆրանսիական իշխանությունների կողմից հարուցած փոխադրական դժվարություններից ու սահմանափակումներից, դադարել է հայ կամավորների առաքումը Ֆրանսիա, ուստի կամավորագրված, սակայն չընդգրկված ամերիկահայ երիտասարդներն իրենց ողջ ուժն ու կարողությունը ծառայեցրել են նաև հանուն որդեգրած երկրի պաշտպանության՝ անդամագրվելով դաշնակցային զինված ուժերի շարքերը: Նրանցից շատերը մեկնել են ֆրանսիական՝ արևմտյան ճակատ՝ կռվելու ընդդեմ Գերմանիայի²⁰:

Մինչդեռ ֆրանսիական բանակ կամավորագրված ամերիկահայերի նպատակը ոչ թե ֆրանսիական ցանկացած ճակատում կռվելն էր, այլ իրենց հայրենիքի ազատագրման համար պայքարելն էր: Այդ կապակցությամբ, “Արևելյան լեգեոն” կամավորագրված ամերիկահայ լեգեոնականի հետևյալ խոսքերը բնորոշում են ԱՄՆ-ից կամավորագրված հայերի շրջանում առկա ընդհանուր տրամադրությունը. “Մենք ձգած էինք Ամերիկյան մեր ազգի դիտերիմ թշնամիին դեմ կռուելու համար, ոչ թե Եւրոպական ճակատներու վրայ: Եթե այդ պատեհությունը պիտի զլացուէր մեզի, բնականաբար պիտի նախընտրէինք Ամերիկեան բանակին մէջ ծառայել”²¹:

Մեծ մասամբ քեսապցի, սեբաստացի, խարբերդցի, արաբկիրցի, չնքուշցի, տիգրանակերտցի, հուսեյնիկցի այդ երիտասարդները ներառում էին ԱՄՆ-ի գրեթե բոլոր հայաշատ նահանգները (օրինակ՝ միայն Մասսաչուսեթսի նահանգից՝ 424 կամավոր, ընդ որում՝ շուրջ 1.000 հայ ունեցող Լուդոնս քաղաքից՝ 78, Ուստրից՝ 76, Բոստոնից՝ 6)²²: Կամավորագրվածների մեծ մասը կուսակցականներ էին՝ վերակազմյալ հնչակյաններ, դաշնակցականներ, սոցիալ-դեմոկրատ հնչակյաններ, ռամկավարներ²³: Պետրոս Տեփոյանի բնորոշմամբ, “Ամերիկահայեր իրենց խորքին մէջ մէկ քանի տասնեակ տարիներով կուսակցական ճիգերու շնորհիւ պատրաստուած

²⁰ Մ. Տ ա մ ա տ ե ա ն. նշվ. աշխ., էջ 115, Տ. Յ. Պ օ յ ա ճ ե ա ն. նշվ. աշխ., էջ 38:

²¹ Տ. Յ. Պ օ յ ա ճ ե ա ն. նշվ. աշխ., էջ 44:

²² Յուշամատեան Մուսա Լեբան, էջ 426, The Armenians in Massachusetts. Boston, 1937, p. 54.

²³ Տ. Յ. Պ օ յ ա ճ ե ա ն. նշվ. աշխ., էջ 86:

բարձրորակ հայրենասերներ էին: Անշուշտ ազատ ապրելու և մտածելու միջավայրը իր մեծ նպաստը բերած էր այդ հայրենասիրության դիեցման աշխատանքին մէջ²⁴:

“Արևելյան լեզեռն” կամավորագրված ամերիկահայերի կազմում կային նաև ամերիկյան բանակի մի շարք բարձրաստիճան զինվորականներ, որոնք տարբեր աստիճաններով են ծառայել լեզեռնի կազմում (հրամանատարներ Ջիմ Չանգայյան՝ կրտսեր ենթասպա-հիսնապետ, Հայկ Ազատյան, Տիգրան Պոյաճյան, Ռուբեն Հերյան՝ կրտսեր ենթասպա-տասնապետ, Գարակոչյան՝ տասնապետ, Վահան Չուրկենց, Վաղարշակ վրդ. Արշակունի, Ջոն Շիշմանյան՝ տեղապահ և այլք)²⁵:

Ամերիկայի հայ ազգային միության ներկայացուցիչ Ռ. Հերյանն անձամբ է մասնակցել ամերիկահայ կամավորների ինքնության փաստաթղթերի պատրաստմանը Նյու Յորքի Մբ. Գրիգոր Լուսավորիչ եկեղեցու ներքնասրահում: Կամավորագրված ականատես Տ. Պոյաճյանի վկայությամբ, “Եկեղեցույ սրահը տեսակ մը ուխտատեղի դարձած էր: Իւրաքանչիւր կամաւոր, Աստուծոյ տան մէջ, իւրովի եւ անձայն կը մրմնջէր աղօթք մը եւ խնդրանք մը ուղղուած Հայուն Աստուծոյն որ զինք ապահով առաջնորդէր մինչեւ կռուի ճակատ, ուր ինք պատրաստ էր իր կեանքը ի սպաս դնելու հայ ժողովուրդի ազատագրութեան սուրբ դատին”²⁶:

Նախնական ծանոթություններից, խրատ-մաղթանքներից հետո տեղի էր ունենում կամավորների ողջերթն ու կանոնավոր առաքումը: Խրախուսող-խանդավառող խոսքեր են ասել կովկասյան կամավորական շարժման մասնակիցներ Խանը (Մանուկ Պաղտասարյանը), Ջ. Չանգայյանը և այլք՝ “ոմանք զսպուած արցունքներով, ուրիշներ հոետորական, խանդավառ եւ ոգեւորիչ”²⁷: Տպավորիչ էր 1917 թ. օգոստոսի վերջին մեկնող կամավորների խմբին ուղղված Մուշեղ Շահինյանի (հետագայում՝ նահատակ) ողջերթի խոսքը [ավելի ուշ՝ Երկրորդ աշխարհամարտի տարիներին, այն տպագրվել է նաև Բոստոնի “Պայքար” օրաթերթի (7 օգոստոսի 1943 թ.) էջերում՝ ոգևորության, հույսի և ներշնչումի ալիք բարձրացնելով ամերիկահայերի շրջանում]։ “Ով Հայ Կամաւորներ, հայոց գերեալ հայրենիքը, Հայաստան, հինգ հարիւր տարիներէ ի վեր է որ ձեր գալստեան կը սպասէ: Եղէք քաջ ու կորովի: Ազգը գերագոյն յոյսերով զձեզ ճամբու կը դնէ: Դուք հայ ազգին զինուորներն էք: Ազգն անխռով ու մեծ հաւատքով կ’աղօթէ ձեր գործին կատարեալ յաջողութեան համար: Մեր նախահարց դիւցազնական ոգիներու ներշնչմամբ (քալեցէք) յառաջ, դէպի յաղթանակ: Կրնաք վստահ ըլլալ որ ձեր սխրագործութիւնները նոր

²⁴ Պ. Յ. Տեփոյեան. նշվ. աշխ., էջ 186:

²⁵ Յուշամատենան Մուսա Լերան, էջ 428, Ս. Պարթեւեան. Արարա. Հայկական Լեզեռնը, Աղեքսանդրիա, 1919, էջ 88, 102:

²⁶ Տ. Յ. Պոյաճյան. նշվ. աշխ., էջ 38–39:

²⁷ Նույն տեղում, էջ 39:

կեանք, նոր ոգի պիտի արթնցնեն մեր ժողովուրդին մէջ: Ձեր վահանովը կամ ձեր վահանին վրայ վերադարձէք: Երթաք բարեաւ²⁸:

Ամերիկյան բարեկեցիկ ու հանգստավետ կյանքին ընտելացած հայ երիտասարդների համար այնքան էլ դյուրին չէր համակերպվել դժվարություններով և զրկանքներով լի զինվորական կյանքին ու կենցաղին: Այդ մասին են վկայել 1917 թ. հուլիսի 9-ին ֆրանսիական «Լ'Էսփանի» շոգենավով Նյու Յորքից Բորդո մեկնած մի խումբ լեզեռնականներ. «Առաջին վայրկեանէն իսկ, հակառակ մեր խանդավառ տրամադրութեանց, դժգոհելու մէկէ աւելի պատճառներ ունեցանք: Նաւուն ներքնայարկերէն մէկուն մէջ, խճողուեցան մեր տղաքը, անբացատրելի աղտոտութեամբ եւ նեխածութեամբ շրջապատուած: Կարելի չէր ըմբռնել այդքան անհոգութիւն եւ անխնամութիւն ունէ պատասխանատու նաւավարի մը եւ նաւաստիներու մօտ: Ուտելիքը վատ էր եւ անբաւարար, եւ զայն բարելաւելու ոչ ոքի մտքէն կ'անցնէր²⁹: Այդուհանդերձ, ամերիկահայ կամավորներն «... ամէնքն ալ գիտէին որ արծաթեայ մահճակալներ եւ թաւշեայ անկողիններ պիտի չհրամցուէին իրենց³⁰: Նրանք Բորդոյում մնում էին մոտ մեկ շաբաթ, ապա բեռնակիր շոգեկառքի բացօթյա կառաչարքերում խցկված շարժվում էին դեպի Մարսել, ուր, տեղավորվելով որպէս զինվորական բարակներ ծառայող բժշկական վարժարանում, ստանում էին համազգեստ, ներքնագգեստ, կոշիկ և անհրաժեշտ այլ իրեր, ապա մեկ շաբաթից նորից ճամփա էին ելնում դեպի Եգիպտոս՝ Պորտ-Սայիդ³¹:

Հայ կամավորներ փոխադրող ֆրանսիական նավերը Միջերկրական ծովում գերծ չեն մնացել թշնամական հարձակումներից: Այսպէս, 1917 թ. օգոստոսի վերջին Մարսելից Պորտ-Սայիդ 80–85 հայ կամավոր փոխադրող ֆրանսիական «Ամիրալ Օրլի» նավը, հունական կղզիների մոտ ենթարկվելով գերմանական ընդծովայինների հարձակմանը, ընկղմվել է: Ամերիկահայ լեզեռնականներն առանց խուճապի մատնվելու ջրի վրա են մնացել այնքան ժամանակ, մինչև որ անգլիական ռազմանավերն օգնության են եկել՝ նրանց փոխադրելով Կրետեի մոտ գտնվող Միլոս կղզի, ապա՝ Պորտ-Սայիդ³²: Ժամանելով Պորտ-Սայիդ՝ նրանք միացել են ֆրանսիական նավերով այդտեղ փոխադրված Մուսա լեռան հերոսամարտում թրծված սվեդիացի երիտասարդներին, ինչպէս նաև՝ անգլիացիների կողմից որպէս թուրք զինվոր գերված ու Եգիպտոս փոխադրված տաճկահայ զորակոչիկներին և դասալիքներին: Ընդհանուր առմամբ, շուրջ 3.000 հայ կամավոր 1917 թ. հոկտեմբերին ուղարկվել է

²⁸ Նույն տեղում, էջ 39–40:

²⁹ Նույն տեղում, էջ 41:

³⁰ Նույն տեղում:

³¹ Նույն տեղում, էջ 45:

³² Նույն տեղում, էջ 48, 50, Մ. Գ. Ճիգմէճեան. նշվ. աշխ., էջ 355, Խ. Աճէմեան Քհնյ. նշվ. աշխ., էջ 73–74, Յուշամատեան Մուսա Լերան, էջ 417:

Կիպրոս մարզվելու³³ (“Արևելյան լեզեռնի” հիմք հանդիսացած մուսալեոցիներն այդտեղ մարզվում էին արդեն սկսած 1916 թ. նոյեմբերից, որոնց հետագայում միացել են նաև եգիպտահայերը)³⁴:

Այնպես որ, ամերիկահայ կամավորագրվածները նախնական վարժանք էին անցնում Փաթերսոնում (Նյու Ջերսիի նահանգ), գրանցվում՝ Նյու Յորքում, ապա նավով մեկնում Բորդո կամ Մարսել (Ֆրանսիա), հավանության արժանանում ֆրանսիական զինվորական ու քաղաքացիական հրամանատարության կողմից, հանդերձավորվում, այնուհետև ուղարկվում էին Պորտ-Սայիդ (Եգիպտոս) կամ Մոնարկա (Կիպրոս)՝ զինվելու և ամիսներով վարժանքներին մասնակցելու³⁵: Այդ վարժերում էլ ձևավորվել էին 1-ին, ապա նաև՝ հիմնականում ամերիկահայերից բաղկացած 2-րդ և 3-րդ գումարտակները³⁶:

Երեք գումարտակի բաժանված “Արևելյան լեզեռնի” հայկական հատվածը, հավատարիմ իր նախնիների հերոսական ոգուն և շարունակելով նրանց սկսած “Վասն Հայրենյաց” պայքարը, 1918 թ. մայիսի 26-ին՝ Վարդանանց պատերազմի պատմական օրը, Կիպրոսի վերոհիշյալ Մոնարկա վայրում փառավոր գորահանդես է անցկացրել, որին իր խրախուսիչ խոսքով ելույթ է ունեցել նաև լեզեռնի ընդհանուր հրամանատար, ֆրանսիացի գնդապետ Ռոմիեռն³⁷:

Արդեն 1918 թ. կեսերին “Արևելյան լեզեռնի” կազմում հաշվվում էր շուրջ 5.500 զինվոր, որոնցից միայն 400-ն էին սիրիացի, մնացյալ 5.100-ը հայ էին: Լեզեռնի դեկավարներից մեկի՝ ֆրանսիացի սպա Բենուա դ’Ազիի տվյալներով, կամավորների ընդհանուր թիվն ավելի մեծ էր՝ 5.662 մարդ³⁸: Ժամանակակիցների գնահատմամբ՝ “Ան կրնար շուտով բարձրանալ 10000-ի եւ 20000-ի, եթէ միայն մեր “դաշնակիցները” կամենային. եթէ չդաւաճանէին...”³⁹:

Կիպրոսում տաս ամիս մարզվելուց հետո՝ 1918 թ. ապրիլի 8 – մայիսի 2-ը, “Արևելյան լեզեռնն” անցել է Պորտ-Սայիդ, ապա, միավորվելով ֆրանսիական գորամասի հետ, 5.000-անոց զորաբանակով շարժվել է դեպի Սիրիա՝ թուրքական ուժերի դեմ⁴⁰:

³³ Մ. Գ. Ճիզմէճեան. նշվ. աշխ., էջ 354:

³⁴ Տ. Յ. Պոյաճեան. նշվ. աշխ., էջ 66:

³⁵ Նույն տեղում, էջ 10, 46:

³⁶ Օ. Թ. Մալխազունի. նշվ. աշխ., էջ 172, Forgotten Heroes, p. 4, Գ. Լազեան. Հայաստան եւ Հայ Դատը (Վաւերագրեր), Գահիրէ, 1946, էջ 191:

³⁷ Մ. Գ. Ճիզմէճեան. նշվ. աշխ., էջ 355:

³⁸ Ռ. Գ. Սահակյան. նշվ. աշխ., էջ 116:

³⁹ Յուշամատեան Մուսա Լերան, էջ 442:

⁴⁰ Մ. Գ. Ճիզմէճեան. նշվ. աշխ., էջ 355, Գ. Լազեան. Հայաստանը և Հայ Դատը (Վաւերագրեր), էջ 192:

Մայիսից մինչև հուլիսի 12-ն ամերիկահայ կամավորները լեգեոնի կազմում ներգրավվել են Իսմայիլիայի զորաշարժերին, ապա 250 սիրիացու հետ անապատի միջով միացել անգլիացի զենեքալ Էդմունդ Հենրի Ալենբիի հրամանատարության տակ գործող դաշնակից ուժերին՝ դիմադրելու Մուստաֆա Քեմալի զորամիավորներին⁴¹։ Հայ կամավորների միջամտությունից ընդամենը 48 ժամ անց՝ 1918 թ. սեպտեմբերի 19-ին, հինգշաբթի առավոտյան, հաջողվել է գրավել վեց ամիս անգլիական բանակի պաշարման տակ գտնվող Նաբլուսից (Պաղեստին) հարավ՝ Արարայի բարձունքները⁴²։

Այնպես որ, ամերիկահայ կամավորներն «Արևելյան լեգեոնի» իրենց քաջարի հայրենակիցների հետ լուրջ ավանդ են ներդրել Պաղեստինում՝ Արարայի անառիկ բարձունքների վրա թուրքական բանակին պարտության և նահանջի մատնելու գործում։ Կատաղի կովում «առաջին անգամ ըլլալով, Հայկական Լեգեոնի հայ կտրիճները կրակի մկրտություն կ'ստանան»՝ կարճ ժամանակում պարտության մատնելով Էնվեր փաշայի անխորտակելի համարվող ուժերին։ Ռամկավար կուսակցության ամերիկահայ ճանաչված գործիչ Մանուկ Ճիզմեճյանն այդ մասին գրել է. «Գերմանական ու թրքական հմուտ զորավարներէ ամրացուած այս անմատչելի ճակատը կը փշրուի ափ մը հայերու խոյանքին առջեւ, այնքան կատաղի կ'ըլլայ յարձակումը եւ այնքան մոլեգին կռիվը։ ... Հոն է որ երեւան կ'ելլէ հայուն անվեհերութիւնը, դիւցազնութիւնը եւ ռազմական այն յատկութիւնները, որոնք կը պանծացնեն Հայ անունը ի սփիւռս աշխարհի»⁴³։

Արարայում հայ կամավորների ձեռք բերած փայլուն հաղթանակի շնորհիվ դաշնակից ուժերը հնարավորություն էին ստացել արագ ու անարգել հասնել մինչև Հալեպ, իսկ թուրքական ուժերը, ընդունելով իրենց պարտությունը, զինադադարի խնդրանք էին ներկայացրել նրանց⁴⁴։

Դաշնակից տերություններն ու ԱՄՆ-ը, բարձր գնահատելով իրենց հանդեպ հայերի ցուցաբերած անմնացորդ նվիրվածությունը, հայ ժողովրդին համարել են իրենց «փոքրիկ դաշնակից»⁴⁵։

Միլիական ռազմաճակատի ընդհանուր հրամանատար, անգլիացի զենեքալ Է. Հ. Ալենբին հայ ազգային հաստատություններին հղած շնորհակալական հեռագրերում իր գոհունակությունն ու հպարտությունն է արտահայտել Արարայի ճակատամարտում հայ լեգեոնականների ցուցաբերած խիզախության և անձնազոհության առիթով։ Այսպես, 1918 թ. հոկտեմբերի 12-ին Փարիզի Հայ ազգային պատվիրա-

⁴¹ Forgotten Heroes, p. 4, Ռ. Գ. Մ ա հ ա կ յ ա ն. նշվ. աշխ., էջ 116–117։

⁴² Ա. Թ է մ ի ր ե ա ն. Ք է ս ա պ (1909–1946), Պ է յ ռ ու թ, 1956, էջ 82։

⁴³ Մ. Գ. Ճ ի զ մ է ճ ե ա ն. նշվ. աշխ., էջ 355։

⁴⁴ Մ. Պ ա ր թ ե լ ե ա ն. նշվ. աշխ., էջ 11–12։

⁴⁵ Մ. Գ. Ճ ի զ մ է ճ ե ա ն. նշվ. աշխ., էջ 357։

կույթյան նախագահ Պ. Նուբարին հեռագրել է. «... Ես հպարտ եմ հրամանատարութեանս տակ Հայ զորամասս մը ունենալու: Անոնք կռուեցան փայլուն կերպով, եւ մեծ բաժին մը ունեցան յաղթանակին մէջ»⁴⁶: Իսկ մեկ տարի անց՝ 1919 թ. դեկտեմբերի 29-ին, Եգիպտոսի բարձր կոմիսարութեանը Է. Հ. Ալենքին գրել է. «Կը ցաւիմ՝ եթէ հայերուն հերոսական կեցուածքը ըստ բաւականին չճանչցուեցաւ: Գիտեմ թէ անոնք կռուեցան վեհանձնօրէն, եւ ես հպարտ եմ զանոնք իմ հրամանատարութեանս տակ ունեցած ըլլալուս համար»⁴⁷:

Արարայում զոհվել է 22 և վիրավորվել ավելի քան 70 հայ⁴⁸, ընդ որում ամերիկահայ լեգեոնականներից զոհվել է 3-ը և վիրավորվել՝ 14-ը⁴⁹: Ավելի ուշ՝ 1925 թ. հոկտեմբերի 19-ին, զոհվածների աճյունները Եգիպտոսի Ռամկավար-ազատական կուսակցության նախաձեռնությամբ ու Երուսաղեմի Հայոց պատրիարքության ջանքերով Արարայից փոխադրվել են Երուսաղեմ՝ Սիոնի Հայ ազգային հանգստարան և թաղվել Անհայտ զինվորի հողակոյտում, ուր կանգնեցվել է «Արարայի Հայ Քաջերուն» հիշատակը հավերժացնող հուշարձան: Հայ լեգեոնականներից շատերն արժանացել են ֆրանսիական «Մարտական խաչ» պատվանշանի, ինչպէս նաև՝ ֆրանսիական բարձրաստիճան պաշտոնյաների դրվատանքին⁵⁰:

«Արյունի» գրչանունով հեղինակը «Ուխտ մը» վերտառությամբ իր գրվածքում հետևյալ տողերն է նվիրել ամերիկահայ նահատակ չնքուշցի երեք կամավորի՝ Մ. Տեյիբմենձյանի, Մարտիրոս Պապայանի, Պողոս Տրրքճյանի հիշատակին. «Չնքշոյ բարձրաւանդակ ու խրոխտ լեռներու ծոցին մէջ ծնած էին անոնք ու ցեղին տառապանքի ովկիանոսին մէջ՝ վրէժի ու ազատութեան սրբազան երգը երգելով ապրեցան: ... Ինչպէս առիծ մը վանդակի մը մէջ, նոյնն էին անոնք Ամերիկայի մէջ: Հակառակ այս երկրի լայն ազատութիւններուն ու վայելքներուն, ամէն բան դժոխքի մը սարսափելի երեւոյթը ունէր իրենց համար, պարզապէս անոր համար որ խենդն էին հայրենիքին ու հոգինին կ'այրուէր վրէժխնդրութեան բոցով մը: 1917ին կամաւորական ազդանշանը աստուածային հրաման մը նկատեցին ու առաջին առիթով իսկ նետուեցան դէպի պարտականութեան դաշտը, դէպի կռիւ՝ թշնամիին դէմ դիմաց, ճակատ առ ճակատ չափուելու պողպատեայ կամքով մը: ... Անոնք, հակառակ վերքերով պատուած՝ կռուեցան, մինչեւ որ ինկան փառաւոր ու պատուաւոր կերպով, աչքերնին յառած ցեղին ազատագրութեան արշալոյսին»⁵¹:

⁴⁶ Մ. Պ ա թ ե լ ե ա ն. նշվ. աշխ., էջ 11–12:

⁴⁷ Յուշամատենան Մուսա Լերան, էջ 438:

⁴⁸ Մ. Պ ա թ ե լ ե ա ն. նշվ. աշխ., էջ 13:

⁴⁹ Արարա. Նուիրուած Արարայի հինգերորդ տարեդարձին. Հրատարակութիւն Հայ Լեգեոնական Միութեան, Պոսթոն, 1923, էջ 28, Մ. Պ ա թ ե լ ե ա ն. նշվ. աշխ., էջ 77–78:

⁵⁰ Տ. Յ. Պ օ յ ա ճ ե ա ն. նշվ. աշխ., էջ 148, 151, Մ. Գ. Ճ ի զ մ է ճ ե ա ն. նշվ. աշխ., էջ 357–358:

⁵¹ Արարա, էջ 28:

Այնուհետև լեգեոնականները մասնակցել են Սիրիայի և Լիբանանի համար մղված մարտերին. դաշնակից ուժերի հետ շարժվել դեպի Դամասկոս, Հալեպ, մինչև Պոզանթիի լեռները, ապա Պաղեստինի միջով՝ դեպի Բեյրութ, որտեղ, սիրիական զորամիավորումների անջատումով, “Արևելյան լեգեոնը” վերանվանվել է “Հայկական լեգեոնի” (“Légion Arménienne”)⁵²: Մեկ ամիս շարունակ զորամիավորումը գրավված է պահել Պաղեստինը, Լիբանանը:

“Հայկական լեգեոնը” Հայոց ցեղասպանությունից ընդամենը երկու տարի անց ձևավորված առաջին զուտ հայկական զորամիավորն էր՝ աշխարհի տարբեր տեղավայրերից (ԱՄՆ, Եվրոպա, Եգիպտոս, Հարավային Ամերիկա, Ավստրալիա և այլն)⁵³ ժամանած 4.000–5.000 պանդուխտների մասնակցությամբ, արդիական բանակի կազմությամբ, ռազմամթերքով, թեև ֆրանսիական բանակին առընթեր, սակայն՝ նրանից անջատ, իր յուրահատուկ ազգային դիմագծով: Լեգեոնն իր կազմությամբ՝ բարձրաստիճան հրամանատարական կազմով, աստիճանակարգված զինվորականներով, զենքով ու զինամթերքով, ռազմական այլ հատկանիշներով և կարգապահությամբ լիովին համապատասխանում էր ժամանակի առաջավոր բանակներին⁵⁴: Լեգեոնական լեյտենանտ Վահան Փորթուզայանի բնորոշմամբ՝ “Հայկական Լեգեոնը”, որպես զինյալ բանակ, բառիս իրական և ամբողջական իմաստով, առաջին հայկական ռազմական ուժն էր, որը ստեղծվել էր դարեր անց պետական սկզբունքների հիման վրա⁵⁵: Հայ կամավորների թվի ստվարացումով՝ 1918 թ. հոկտեմբերի կեսերին, Բեյրութում Կիպրոսից ժամանած պահեստայիններից ստեղծվել է լեգեոնի 4-րդ գումարտակը⁵⁶:

Ամերիկահայ կամավորները, որոնցից յուրաքանչյուրը մի “հոգու հատոր” ուներ թողած հայրենիքում, ամենայն պատասխանատվությամբ ու անձնվիրաբար էր մարտնչում՝ հույս փայփայելով պատերազմի ավարտին փնտրել և գտնել իրենց հարազատներին, սակայն քիչ չէին նաև իրենց բյուրավոր նահատակ ազգակիցների համար վրեժով լցվածները:

“Հայկական լեգեոնի” ղեկավարությունը կամավորներին պատգամում էր ազգային անսակարկ նվիրվածության և վերկուսակցական անխտրական պարտականությունների մասին: Այսպես, փոխհրամանատար, ամերիկահայ Ջոն Շիշմանյանը խրատել է. “Տղաք, նախ եւ առաջ պէտք է անհունօրէն հպարտ զգանք հայ ծնած ըլ-

⁵² Մ. Քէլէշեան. Սիւ-Մատեան. Պատմական, բանասիրական, տեղագրական, ազգագրական եւ յարակից պարագաներ, Պէյրութ, 1949, էջ 592, Forgotten Heroes, p. 7.

⁵³ Տ. Յ. Պօյաճեան. նշվ. աշխ., էջ 71, Forgotten Heroes, p. 3.

⁵⁴ Ա. Անդրէասեան. Խոհեր գրական, ազգային եւ հասարակական, հ. Բ, Լոս Անճելըս, 1976, էջ 373:

⁵⁵ Forgotten Heroes, p. 4.

⁵⁶ Ռ. Գ. Սահակյան. նշվ. աշխ., էջ 117:

լավնուս համար: Հոգ չէ թէ բարեկամներ կամ թշնամիներ ինչպիսի համարում ունին մեր ազգին վրայ: Կը բաւէ որ մենք, իբր զինուորներ, անթերիօրէն կատարենք մեր զինուորի մեծ ու դժուարին պարտականութիւնները: Բանակին մէջ դասակարգային խրամներ պէտք չէ որ բացուին: Ձինուորը որեւէ կուսակցութեան չի պատկանիր: Ձինուորին կուսակցութիւնը զինք ծնող ազգն է: Ձինուորը դասակարգային դրօշակ չունի եւ պէտք չէ որ ունենայ: Ձինուորը առաջնորդող դրօշակը միայն եւ միայն բովանդակ ազգութեան խորհրդանիշը իր ծալքերուն մէջ խտացնող ազգային դրօշն է»⁵⁷:

Նոր կամավորների հավաքագրման հոսքն ավարտվել է 1918 թ. հոկտեմբերի 30-ին Մեծ Բրիտանիայի և սուլթանական Թուրքիայի միջև կնքված Մուղոսի զինադադարի արդյունքում, որով ամրագրվել է Օսմանյան կայսրության կապիտուլյացիան: Նոյեմբերի 11-ին դաշնակիցները հաղթանակած են դուրս եկել պատերազմից: Ձինադադարի 16-րդ հոդվածի համաձայն՝ թուրքական զորքը պէտք է դուրս բերվեր Կիլիկիայից: Փոխարենը, նոյեմբերի վերջին հայ լեզեոնականների մի մասը Բեյրութից ֆրանսիական նավերով փոխադրվել է Ալեքսանդրետ, իսկ մյուս մասը դեկտեմբերի կեսին անգլիական նավերով շարժվել է դեպի Մերսին: 1918 թ. դեկտեմբերի 17–19-ին «Հայկական լեզեոնը» ոտք է դրել բաղձալի Կիլիկիա»⁵⁸:

Այդ առիթով գրող, հրապարակախոս և խմբագիր Սուրեն Պարթևյանը ողջունի կոչ է հղել հայ քաջարի լեզեոնականներին. «... Ձեր երախտիքը չի՛ մոռցուիր, քաջորդիներ ը, եւ լռութեան բոլոր դաւերն իսկ չէ՛ն կրնար արգիլել որ Հայ Գաղափարին տաճարակիրները՝ ցեղին փառքին ու հպարտութեան համար՝ յաւէտ տարփողեն, պանծացնեն Արարան ու Հայկական Լեզեոնը: Ողջո՛յն, ձեզի՛, Հայ Լեզեոնականներ՛ ը, մատա՛ղ ձեր ոտքերուն, որ հիմա Ռուբէններու, Թորոսներու, Լեւոններու հայկական հողը տիրաբար կը կոխեն՝ Տարոսէն Արարատ Միացեալ Հայաստանին մեծ երկունքը դրդաւետելով»⁵⁹:

Կիլիկիայի ազատագրումն իրականացնելու և «Կիլիկիան ամբողջութեամբ հայերուն ձգելու»⁶⁰ Սայքս-Պիկոյի ներքին պայմանավորվածության համաձայն 1918 թ. դեկտեմբերին հայ լեզեոնականներն ուղարկվել են օսմանյան տարածք՝ վերահսկելու ու պաշտպանելու ստրատեգիական հենակետերը, հայաբնակ Ադանան, Այնթապը, Մարաշը, Ուրֆան, Հաճրնը և այլն: Արդյունքում, Հայոց ցեղասպանության հետևանքով Կիլիկիայից տեղահանված շուրջ 120.000 հայ վերադառնում է իր հայ-

⁵⁷ Տ. Յ. Պոյաճեան. նշվ. աշխ., էջ 88:

⁵⁸ Ռ. Գ. Սահակյան. նշվ. աշխ., էջ 118:

⁵⁹ Մ. Պարթևեան. նշվ. աշխ., էջ 128:

⁶⁰ Մ. Քէլէշեան. նշվ. աշխ., էջ 594:

րենի օջախները՝ հույսով, որ անգլո-ֆրանսիական ուժերի պաշտպանության ներքո խաղաղությամբ կվերականգնեն իրենց ընդհատված կյանքը Կիլիկիայում⁶¹:

Այդ կապակցությամբ Մ. Տամատյանը՝ որպես Ամբողջական Հայաստանի պատվիրակության (ներառած՝ Հայաստանի Հանրապետությունը և Փարիզի Հայ ազգային պատվիրակությունը) ներկայացուցիչ, ուղարկվել է Կիլիկիա՝ ղեկավարելու “Հայկական լեգեոնի” գործունեությունը, ինչը, սակայն, շուտով բազմիցս խոչընդոտվել է ֆրանսիական իշխանությունների կողմից: Խոչընդոտներից մեկն էլ այն էր, որ թեև Մուղղոսի զինադադարի համաձայն թուրքական զորքը դուրս էր բերվում Կիլիկիայից, սակայն նահանջելիս նրանք, այնուամենայնիվ, իրենց ողջ զենքն ու զինամթերքը պետք է թողնեին մահմեդական բնակչությանը: Ֆրանսիական իշխանությունը ոչ միայն դրա դեմ միջոցներ չի գործադրել, այլև, ընդհակառակը, ընդհատել է հայ կամավորների հոսքը դեպի Կիլիկիա⁶²:

Հայ կամավորները, ինչպես և նախատեսված էր, որպես քաղաքապահ զինվորներ, ձեռնամուխ են եղել տեղի հայ բնակչության կյանքի ու գույքի անվտանգությունը պաշտպանելուն, սակայն նրանց այս գործունեությունը, ֆրանսիական իշխանությունների վարած անսկզբունքային և նենգ քաղաքականության արդյունքում, կարճատև է եղել: Անգլիայի կողմից Կիլիկիայի հովանավորությունը Ֆրանսիային հետզհետե հանձնելուն զուգընթաց, վերջինս խստացրել է իր վերաբերմունքը ֆրանսիական բանակի առաջապահներ հանդիսացող հայ լեգեոնական-զինվորականների նկատմամբ: Ֆրանսիան ոչ միայն բախտի քմահաճույքին է լքել իր դրոշի ներքո արյուն ու կյանք տված հայ վիրավոր լեգեոնականներին, այլև լեգեոնը տկարացնելու միտումով նույնիսկ տարբեր պատրվակներով շուրջ մեկ տասնյակ հայ կամավորների աքտրել է Ալժիր, փոխարենը՝ Կիլիկիա տեղափոխել ալժիրցի անձար զինվորականների, ապա Կիլիկիայից հեռացրել է “Հայկական լեգեոնի” հմուտ սպաներին, ամերիկահայ հրամանատարներ Ջիմ Չանգայանին, Ջոն Շիշմանյանին և այլոց, ինչպես նաև ազգային միությունների անդամներին: Ֆրանսիական պաշտոնական շրջանների կողմից իրականացվող այդ նոր ու բացահայտ հակահայկական գործողությունները պայմանավորված էին 1919 թ. օսմանյան քայքայված կայսրությունում սկզբնավորված և հուժկու թափ ստացած քեմալական շարժմամբ, քանի որ Առաջին աշխարհամարտից հետո Ֆրանսիան, Անգլիայի նման, սկսել էր վարել թրքամետ քաղաքականություն⁶³: Կամավորական շարժման մասնակից Տ. Պոյաճյանի գնահատմամբ, “Դաշնակիցները ընդհանրապես, իսկ “ասպետական” Ֆրանսա մասնաւորապէս, տրամադիր էին ընդունելու թրքական պա-

⁶¹ Forgotten Heroes, p. 7.

⁶² Տ. Յ. Պոյաճյանն. նշվ. աշխ., էջ XXV, Հայ ժողովրդի պատմություն, հ. 6, Երևան, 1981, էջ 562, Ռ. Գ. Սահակյանն. նշվ. աշխ., էջ 118:

⁶³ Մ. Գ. Ճիգմեճեանն. նշվ. աշխ., էջ 358–359, 449, 472:

հանջներու արդարութիւնը⁶⁴: Արդյունքում, 1919 թ. նոյեմբերի 1-ին անգլիական, իսկ 1920 թ. հունվարի 18-ին ֆրանսիական զորամիավորումները հեռանում են Կիլիկիայից՝ հային «յանձնելով իր անագորոյն թշնամիին ձեռքը»⁶⁵:

1920 թ. Մարաշում, Միսում, Ադանայում, Ջեյթունում, Պոզանթիում, Ուրֆայում, Այնթապում (ընդհատումներով 314 օրյա հերոսամարտ), Ֆրնտրճագում, Դյորթ Յոլում, Մերսինում, Հաճընում (8-ամսյա գոյամարտ) և այլուր հայ զինվորն ու ժողովուրդը հերոսական դիմադրություն են ցույց տվել քեմալական հորդաներին: «Հայկական լեգեոնը» քաջարի մարտիկները, ովքեր նպատակադրվել էին դառնալ հայկական ինքնավար Կիլիկիայի զինվորական ուժի կորիզը, հակառակ արևմտյան հրամանատարության կողմից իրենց հանդեպ ցուցաբերած խարդախ վերաբերմունքին, շարունակել են մնալ Կիլիկիայում և Ջ. Շիշմանյանի ղեկավարությամբ՝ «ուժն ու ողնայարն էին այս դիցազնական կռիւներուն» ևս⁶⁶:

1920 թ. օգոստոսի 10-ին Սևրի հաշտության պայմանագիրը, ըստ որի՝ Կիլիկիան հանձնվում էր Ֆրանսիայի հովանավորությանը, հայերին կրկին հույս է ներշնչել Ֆրանսիայի օգնությամբ Կիլիկիայում հայկական ինքնուրույն պետություն ստեղծելու համար: Նույնիսկ նշանակվել էր կառավարիչ՝ հանձինս Միհրան Տամատյանի, որի նստավայրը լինելու էր Ադանայում: Սակայն Ֆրանսիայի մերձավորարևելյան քաղաքականության մեջ տեղի ունեցած շրջադարձի ու քեմալականների հետ մերձեցման քաղաքականության հետևանքով ֆրանսիական զինվորական իշխանությունը մեկ օր անց ցրել է հայկական այդ կառավարությունը, իսկ նույն թվականի սեպտեմբերի 27-ին լուծարել արդեն գարնանը մասնակի զինաթափման ենթարկված և հետզհետե սակավացող «Հայկական լեգեոնը» (չորս գումարտակից մնացել էր միայն մեկը. 5.000 կամավորից՝ նվազ, քան՝ 1.000): 1921 թ. սկզբին «Հայկական լեգեոնը» վերջնականապես լուծարվեց⁶⁷:

Կիլիկիո ընդհանուր զինվորական կառավարիչ, ֆրանսիացի գնդապետ Էդուարտ Բրեմոնը վստահորեն հայտարարում էր. «Ըսէ՛ք բոլոր Հայերուն. Ֆրանսսան երբէ՛ք միտք չունի Հայաստանն ու Կիլիկիան իր «գօլօնիեն դարձնելու կամ «բրօթէքթօրա»ն ընելու: Մենք միայն այդ երկիրները կազմելու եւ Հայոց յանձնելու համար հոս կուզանք»⁶⁸: Ֆրանսիացի կառավարիչը իր սվինավոր զինվորներով անձամբ է ցրել Կիլիկիայի Հանրապետության վարչապետ Միհրան Տամատյանի կառավարությունը, որը 1920 թ. օգոստոսի 4-ին Կիլիկիան հռչակել էր թուրքական գերիշխանությունից անկախ: Կառավարությունն առաջադրվել էր հայկական կուսակցութեանը:

⁶⁴ Տ. Յ. Պօյաճեաւն. նշվ. աշխ., էջ 389:

⁶⁵ Forgotten Heroes, p. 8; Մ. Քէլէշեաւն. նշվ. աշխ., էջ 594:

⁶⁶ Մ. Քէլէշեաւն. նշվ. աշխ., էջ 648, Յուշամատեան Մուսա Լեւրան, էջ 446:

⁶⁷ Հայ ժողովրդի պատմություն, էջ 578, Յուշամատեան Մուսա Լեւրան, էջ 446:

⁶⁸ Մ. Պարթեւեաւն. նշվ. աշխ., էջ 119:

յունների ու կրոնական հարանվանությունների կողմից և հավանության էր արժանացել Կիլիկիայի քրիստոնյա բնակչության (հայ, հույն, սիրիացի, քաղդեացի, ասորի, հակոբիկյան) կողմից⁶⁹՝ առ ի գործադրումն 1916 թ. Մայքս-Պիկոյի համաձայնագրի, որով Ֆրանսիան պարտավորվում էր Ասիական Թուրքիայի մաս կազմող տարածքում իր հրամանատարության տակ թուրքերի դեմ կռված հայերի հաղթանակի դեպքում նրանց համար ապահովել ֆրանսիական հոգատարության ներքո Կիլիկիայի ինքնավարությունը:

1921 թ. հոկտեմբերի 20-ին Անկարայում կնքված ֆրանս-քեմալական դաշնագրով Ֆրանսիան պաշտոնապես ամրագրել է իր նահանջը՝ Կիլիկիան թողնելով թուրքական տիրապետության ներքո⁷⁰՝ միաժամանակ վերջինիս տրամադրելով մեծ քանակությամբ զենք, զինամթերք հանդերձանք և այլն:

Ֆրանսիան և Արևմուտքի մյուս տերություններն անարձագանք են թողել նաև Կիլիկիայի պարպումի օրերին “Ազգային Տուն” ստեղծելու Փարիզի Հայ ազգային պատվիրակության գործադրած միջազգային ջանքերը⁷¹:

Կիլիկիայի պարպումը հայերին ստիպել է կրկին արտագաղթել. 120.000 հայ նավերով դիմել է անհայտ հորիզոններ: Հայ լեզեռնականներից ոմանք մնացել են Կիլիկիայում՝ օգնելու իրենց հայրենակիցներին, սակայն շատերը ետ են վերադարձել իրենց համայնքներ⁷²: Լեռն այս առիթով գրել է. “Կիլիկիան դատարկվում էր հայությունից, ինչպես դատարկվել էր բուն Հայաստանը”⁷³:

1922 թ. հունվարի 4-ին Կիլիկիան ամբողջությամբ պարպվել է հայությունից: Հայ լեզեռնականի գնահատմամբ՝ “Ֆրանսայի պատիւը հողին հաւասարած էր: Հայ Լեզեռնականին, հայ մարտիկին, եւ համայն հայ ժողովուրդին գերագոյն զոհողութիւնները շահագործումի առարկայ եւ դաւադրութեանց զոհ եղած էին”⁷⁴:

Արարայի հերոսամարտից 20 տարի անց Ֆրանսիան Թուրքիային է հանձնել նաև մինչ այդ ֆրանսիական հովանավորության տակ գտնվող Կիլիկիայի վերջին պատվարը՝ Ալեքսանդրետի սանջակը⁷⁵: 1939 թ. հուլիսի 23-ին թուրքական զորքերը մտել ու գրավել են այն և, որպես Հաթայի ինքնավար տարածք, 1-2 ամիս անց կցել Թուրքիային⁷⁶:

⁶⁹ Մ. Գ. Ճիգմեճեան. նշվ. աշխ., էջ 471, Յուշամատեան Մուսա Լերան, էջ 448:

⁷⁰ Forgotten Heroes, p. 11.

⁷¹ Մ. Գ. Ճիգմեճեան. նշվ. աշխ., էջ 359:

⁷² Վ. Ա. Պարսամյան, Շ. Ռ. Հարությունյան. Հայ ժողովրդի պատմություն, Երևան, 1979, էջ 437, Forgotten Heroes, p. 11.

⁷³ Վ. Ա. Պարսամյան, Շ. Ռ. Հարությունյան. նշվ. աշխ., էջ 438:

⁷⁴ Տ. Յ. Պոյաճեան. նշվ. աշխ., էջ 412:

⁷⁵ Մ. Քէլէշեան. նշվ. աշխ., էջ 651:

⁷⁶ Նույն տեղում:

Միսաք Քելեշյանի բնորոշմամբ՝ «Ֆրանսսան իր վարկը կորսնցուց Արևելքի մէջ: 1938ին Ալէքսանտրէթը թուրքերուն լքելէ վերջ, 1946ին ալ ստիպուեցան պարպել Միրիան և Լիբանանը շատ ամոթալի պայմաններու ներքեւ: Մե՛ դը հին ազնիւ Ֆրանսային»⁷⁷:

Թե՛ն Կիլիկիայի ազատագրման համար գործադրված ջանքերը վերջին հաշվով ձախողվեցին, այդուհանդերձ, անուրանալի է նաև ամերիկահայ կամավոր երիտասարդության մասնակցության նշանակությունը «Արևելյան լեգեոնի» («Հայկական լեգեոն») ձեռք բերած մարտական հաջողությունների գործում, քանի որ նա «... չսակարկեց իր արեան գինը. կտրեց ովկէանոսը եւ մեր երեկի փառքին մէկ անկիւնը՝ Կիպրոս կղզին եղաւ անոր առաջին փորձավայրը: Հազարաւորներ գրկեցին հրացանը, եղբայրացան անոր հետ, առին վառոդին հոտը, զգացին զինուորական կարգապահութեան ծանրութիւնը, ճաշակեցին զրկանքի լեղին եւ հաղորդուեցան գոյապայքարի արիւնովը...»⁷⁸:

Պատերազմի ավարտից հետո ԱՄՆ-ի կառավարությունը, գնահատելով ամերիկահայերի նվիրվածությունը, նրանցից շատերին արժանացրել է բարձր պարգևների, շնորհել մեծ արտոնություններ ու նպաստներ: Բացի այդ, ԱՄՆ-ի բանակում ծառայած ամերիկահայ զինվորականները վերադառնալով՝ ավելի մեծ արտոնություններից են օգտվել, քան ֆրանսիական դրոշի ներքո մարտնչած ամերիկահայ լեգեոնականները, ովքեր, վերջին հաշվով, զրկվել են ամեն տեսակի նպաստներից, իրավունքներից և արտոնություններից՝ հանձնվելով բախտի քմահաճույքին: Միայն Ամերիկայի հայ ազգային միության շնորհիվ էր, որ նրանց վիրավոր ու կարիքավոր մասը ստացել է ընդհանուր առմամբ շուրջ 1.193 դոլարի օգնություն. բազմաթիվ ամերիկաբնակ կամավորների շնորհիվ էլ միության «Պատվո վկայագիր»⁷⁹:

Կովկասում կամավորական շարժման (1914–1916 թթ.) լուծարումից կարճ անց «Հայկական լեգեոնի» մղած հերոսական կռիվները բաղձալի երկրի ազատագրման համար Առաջին աշխարհամարտի ընթացքում հայության ունեցած թվով երկրորդ կազմակերպված զինյալ գործողությունն էր: Ամերիկահայ հրապարակախոս և ազգային գործիչ Անդրանիկ Անդրեասյանի բնութագրմամբ՝ «... ձեռնարկին քաղաքական ձախողանքը ոչի՛նչ կը պակսեցնէ Հայկական Լեգեոնի արժէքէն ու նշանակութենէն: ... Որովհետեւ անոնք (հայ լեգեոնականները – Ք. Ա.) ապրող վկաները եղան հայ մարտական ոգիին ազնուական ու խիզախ խոյացումին: Եւ նոր արժանիք ու յատկանիշ աւելցուցին հայ ազատագրական պայքարի ասպարէզին վրայ»⁸⁰:

⁷⁷ Նույն տեղում, էջ 650:

⁷⁸ Յուշամատեն Մեծ Եղեռնի, 1915–1965, էջ 896:

⁷⁹ Տ. Յ. Պօյաճեան. նշվ. աշխ., էջ 87, Տեղեկագիր Հայ Ազգային Միութեան Ամերիկայի. 1917–1921 թթ., էջ 28:

⁸⁰ Ա. Անդրէասեան. նշվ. աշխ., էջ 373, 375:

Մ. Պաղտասարյանն իր «Կամավորը» հողվածում, հանրագումարի բերելով հայ կամավորական շարժման արդյունքները, եզրակացրել է. «... Նիւթապաշտ Եւրոպան եւ Ամերիկան, թող հաստատապէս ըմբռնեն՝ թէ օր մը այս բոլորին համար հաշիւ պիտի տան մեզի: Նահատակ Հայաստանի ազատագրութեան համար կազմակերպուած Հայ կամաւորական գունդը մոռցած չէ եւ չի կրնար մոռնալ իր Հայրենիքը եւ ազգը, զոր դաշնակիցներու էնթրիկներուն շնորհիւ քաւութեան նոխազ եղաւ»⁸¹:

Ուստի, ապագայի համար հայ կամավորի գործնական հավաքական եզրակացությունն առավել քան որոշակի է. «Ա. – Քաղաքական միացեալ ճակատ ունենալու ենք: Բ. – Հայրենիքի ազատութեան սրբազան սեղանին վրայ պէտք է գոհել բոլոր անհատական ու կուսակցական առանձին եսերն ու շահերը՝ Հայրենիքին եսն ու շահը տիրական ըլլալու համար: Գ. – Թրեքամարտ կիրքերը պէտք է լռեն իսպառ: Հայրենիքին կիրքը եւ ձայնը պէտք է լսուի ամէն կողմ: Դ. – Ուժ տալ գաղութներու մէջ զինավարժութեան եւ ապագայ ազատագրական պայքարին համար հաւատարիմ, հնազանդ եւ կարգապահ զինուորեալ երիտասարդութիւն մը պատրաստել, ահաւասիկ Հայ կամաւորին իտէալը»⁸²:

Այնպէս որ, հայ ժողովրդի համար ճակատագրական դարձած Առաջին աշխարհամարտին և հաջորդող տարիներին ամերիկահայությունը, համախմբելով իր ներգաղութային ողջ մտավոր, նյութական, հասարակական, կուսակցական ու այլ կարողությունները, դիվանագիտական, քաղաքական, ռազմական, մարդկային և հնարավոր բոլոր միջոցներով սատարել է հայրենի ժողովրդի պաշտպանության, բաղձալի երկրի ազատագրության ու վերականգնման նվիրական գործին:

Այդուհանդերձ, ԱՄՆ-ի հայերի, ինչպէս և ողջ հայության գործադրած բազմակողմանի ջանքերը բախվել են արևմտյան տերությունների կողմից դեռևս Առաջին աշխարհամարտով սկզբնավորված, Հայոց ցեղասպանությամբ առաջ մղված ու հետագա տարիներին հետզհետե ծավալված Մերձավոր Արևելքի գրավման աշխարհաքաղաքական մեծ ծրագրերին, խարդախ շահերին և երկդիմի խաղերին: Որպէս այդ ամենի հետևանք՝ Օսմանյան կայսրությունում և ցարական Ռուսաստանում տեղի ունեցած քաղաքական արմատական փոփոխություններն ու ճգնաժամային իրավիճակը, վերջին հաշվով ի դերն են արել տարբեր գաղթօջախներից, այդ թվում՝ ԱՄՆ-ից, միահամուռ կամքով և ազգային զիտակցությամբ համախմբված հազարավոր հայ կամավորների սրբազան ձգտումները՝ տարագիր հայությանը վերջնականապէս ամրացնելով որդեգրած նոր երկրներին և դատապարտելով նրանց անխուսափելի ձուլման ու ուժացման:

⁸¹ Արարա, էջ 15:

⁸² Նույն տեղում, էջ 17:

УЧАСТИЕ И СОДЕЙСТВИЕ АРМЯН США
ДОБРОВОЛЬЧЕСКОМУ ДВИЖЕНИЮ КИЛИКИЙЦЕВ
(1916–1920 гг.)

(К 100-летию победы, одержанной «Армянским легионом» в Арарайском сражении 1918 г.)

КНАРИК АВАКЯН

Резюме

В годы Первой мировой войны (1914–1918 гг.), равно как и в послевоенные годы, американские армяне принимали деятельное участие в добровольческом движении, организованном на Кавказе, затем в Киликии, героически сражаясь вместе с войсковыми подразделениями царской России и Франции против немецких сил, младотурок и кемалистов.

С целью организации и регулирования добровольческого движения западных армян в Киликии, возглавленного французским командованием, а также проведения иных благоприятствующих армянам мероприятий и контроля, в марте 1917 г. в Бостоне была создана первая армянская лоббистская организация в США – Армянский национальный союз Америки, состоявшая из представителей четырех политических партий (Социал-демократическая партия Гнчак, Реорганизованная гнчакская партия, Армянская революционная федерация Дашнакцутюн, Армянская конституционная партия Рамкавар), двух армянских церковных конфессий (Апостольская и Евангелическая) и Всеобщего армянского благотворительного союза. За короткий период в США было создано 187 филиалов союза.

Только за пять месяцев – с 9 июня по 3 ноября 1917 г. – с целью участия в организованном при содействии французов добровольческом движении было зарегистрировано 5000 американских армян-добровольцев, но из-за нехватки транспортных средств к движению смогли примкнуть лишь 1172 человек.

19 сентября 1918 г. героическое сражение на Араре, осуществленное армянскими добровольцами, в том числе и их соотечественниками из США, которых объединило чувство национального сознания под флагом «Армянского легиона», стало важным военным действием за освобождение желанной земли – Киликии. Однако, в силу геополитических интересов западных государств и их двуличных политических игр, сокровенные устремления и чаяния тысячи армянских добровольцев, в том числе и из США, остались нереализованными.

THE PARTICIPATION AND CONTRIBUTION OF THE
USA ARMENIANS TO THE CILICIAN
VOLUNTARY MOVEMENT (1916–1920)

(On the occasion of the 100th anniversary of the victory of the “Armenian Legion” at the Arara battle in 1918)

KNARIK AVAGYAN

Summary

During the years of the World War I (1914–1918) and after, the Armenian-Americans actively participated in the voluntary movements in the Caucasus and Cilicia, together with the contingents of the Tsarist Russia and France, side by side courageously fighting against German forces and the Young Turks and Kemalists.

In order to organize and regulate the voluntary movement of the Western Armenians under the French Command in Cilicia, as well as to carry out and to supervise other pro-Armenian initiatives, in March, 1917, the first Armenian lobbying organization in the US, the Armenian National Union of America was organized in Boston. It consisted of four political parties (Social-Democrat Hnchak, Reorganized Hnchak, Armenian Revolutionary Federation–Dashnaksoutyoun, Armenian Constitutional Ramgavar Parties), two national churches (Apostolic, Evangelical) and the Armenian General Benevolent Union representatives. During a short time period, 187 branches of the Union were established the United States.

In the course of only five months, from June 9 to November 3, 1917, 5.000 Armenian-Americans were registered in order to participate in the voluntary movement launched under French protection, but due to the lack of means of transport, just 1.172 had an opportunity to leave.

In September 19, 1918, the heroic battle of Arara, given by the Armenian volunteers, as well as their compatriots from the USA, who were united under unanimous will and national consciousness under the flag of the “Armenian Legion,” was a significant military action for the liberation of the desired land – Cilicia. However, colliding with the geopolitical interests and ambiguous games of the Western powers, the sacred aspirations of thousands of Armenian volunteers, including the United States, faded.